

Rahsia Graduan Cemerlang



Kuantan, 17 November – Minat dalam berorganisasi dan aktif terhadap aktiviti ko-kurikulum antara penyumbang utama kecemerlangan bagi graduan Universiti Malaysia Pahang (UMP), Nurul Akma Mohamad Rani, 23, yang terpilih sebagai penerima Anugerah Profesor Dato' Dr Mashitah Mohd Yusoff pada Majlis Konvokesyen UMP kali ke-12 baru-baru ini. Anak ke enam daripada sepuluh orang adik beradik ini berkata, minatnya itu mengajar dirinya supaya bijak dalam sistem pengurusan masa. Beliau pernah memegang jawatan Exco Keusahawanan Perwakilan Kolej Kediaman (PEKA 3) Sesi 2013/2014 dan Sesi 2015/2016.

Selain itu, beliau juga merupakan Setiausaha Kehormat Majlis Perwakilan Pelajar (MPP) Sesi 2014/2015 dan Naib Presiden Sekretariat Himpunan Siswazah Anak Kelantan (SEHIMSAK) Sesi 2015/2016. “Ini membuatkan saya mencapai keputusan yang membanggakan kerana dapat menimba ilmu, berkongsi pengalaman, dan memperoleh kemahiran insaniah dari individu yang datang dari latar belakang yang berbeza,” katanya. Berbekalkan falsafah hidup, “Jika nekad, tiada siapa boleh menghalang tetapi jika menidakkannya, dipimpin dan diangkat pun tidak menjadi”, beliau telah memenangi beberapa anugerah hasil penyelidikan di peringkat Ijazah Sarjana Muda Sains Gunaan (Kepujian) Teknologi Bahan di bawah seliaan Dr Farah Hanani Zulkifli dari Fakulti Sains dan Teknologi Industri (FIST).



Antara anugerah yang telah dimenangi oleh beliau adalah anugerah Timbalan Naib Canselor Hal Ehwal Pelajar dan Alumni dalam Pertandingan Reka Cipta, Kreatif dan Inovasi (CITREX) pada tahun ini. Beliau turut memenangi pingat emas dalam pertandingan yang sama. Dalam masa yang sama, beliau juga memenangi anugerah Khas dalam pertandingan World Invention Intellectual Property Associations (WIIPA) di Taiwan serta Double Gold Awards of Innovation Design Research International Symposium (IDRIS).

Anak kepada pasangan Mohamad Rani Mat, 58 yang bekerja sebagai pembantu awam dan ibunya, Faridah Ismaili, 53, bertugas sebagai pembantu operasi di Sekolah Menengah Kebangsaan (SMK) Pahi menjadikan ibu bapanya sebagai pendorong utama untuk beliau sampai ke tahap ini. Menurut nya lagi, jika kita tidak berani untuk mencuba, maka peluang tersebut akan terlepas dan masa tidak akan berputar kembali. Beliau kini berkhidmat sebagai pembantu penyelidik di UMP berharap untuk menyambung pelajaran di peringkat yang lebih tinggi jika diberi peluang. Selain itu, beliau juga berhasrat menjadi salah seorang penyumbang dan penyelidik formulasi baru untuk masa depan yang lebih baik dalam segi teknologi, kesihatan dan kemasyarakatan.

Disediakan oleh Nur Laila binti Afandi dan disunting oleh Bahagian Komunikasi dan Korporat.

Posted By : NUR LAILA BINTI AFANDI Date Posted : 14-12-2017, 15:55:24